

EWE ANIWINSEFANITON

EWE KAPAS ALLIMEN JISES KRAIST





KOT I SEMOM WON NANG MI UNUSEN TONG

Kot I Semom won Nang. A sinei en pwisin me a tongeok nap seni met ka tongeni weweiti. A mochen om kopwe pwapwa non ei manau me non manau ese much.

Ren an epwe apwoueta ei popun, Semach won Nang a awora eu kokot a iteni ewe **kapas allimen*** Jises Kraist. Jises Kraist i ewe Noun Kot; Manauan me an kewe afanafan ra emwen ngeni kinamwe non ei manau me pwapwa non manau ese much.

*Semach won Nang a
aniwinsefanito—ennet—seni
nang minne ka tongeni kaeo
me manaueni. Ekkei minen
ennet mi pwarata ngeni ekkewe
soufos seni nepoputan.*

EWK KAPAS ALLIM A EFEIOCHU FAMINI TORI EMON ME EMON

Ewe kapas allimen Jises Kraist epwe efeiochu meinisin ekkewe ir ra etiya me manaueni. Me non ekkewe famini ena eu neni mi fakkun och ne aiti me anganga ewe kapas allim. Kot a efisata ach kewe famini ne esenipato pwapwa ngeni Noun kewe semerit, mut ngeni kich ach sipwe kaeo nongonong mi pung non eu nenien tong, me ammonakicheta ne niwiniti I mwirin sia mano. Ina mo nonno-much nefinen chon famini mi tongeni weires fan ekkoch, Semach won Nang epwe efeiochu kich nupwen sia tiniken ne tapweno ekkewe afanafanen Jises Kraist. Ekkei afanafan repwe anisi kich ne apochokuna ach kewe famini.

SEMACH WON NANG MI PWARATA AN KAPAS ALLIM

Usun eu kinikinin An we kokot, Kot a kefinita soufos, usun chok Adam, Noah, Abraham, me Moses. Soufos:

- Afanafan usun Kot me ir chon pwarata mi auchea usun Noun we, Jises Kraist.
- Angei **pwarata**, are emwen seni ewe Samon.
- Afanafana ewe kapas allim ngeni chon ewe fonufan me awewe ewe kapasen Kot.

*Wewen ekkewe kapas mi parapar mi fateti won peich 18 me 19.

Ewe kapas allimen Jises Kraist a tongeni apochokuna om famini.

Ekkewe soufos ra angei ewe **pristut**, are ewe mwumwuta ne fos me angang faniten Kot ne emweni Noun kewe semerit. Aramas ra tapweno ekkewe soufos repwe angei ekkewe feioch Kot a pwon ngenir. Ekkewe ir ra amam ewe kapas allim me noun Kot kewe soufos resap angei ekkana feioch me ra atouaua pwisin ir seni Kot. Ekkewe ir ra amam ekkewe soufos me ponuku ar pwon ne tapweno Kot ra nonnom non eu sokkun mettoch a iteni **rochopwak**.

Pwaratan ennet mi
poutuno nupwen aramas
ra amam ekkewe soufos.

Ina mo chommong Noun kewe semerit ra chok akamam I me Noun kewe soufos, Semach won Nang mi sopweino ne tongei Noun kewe semerit. A mochen ngeni kich mettoch meinisin mi namwot ach sipwe pwapwa iei me niwinsefaniti I mwirin sia mano. Ekkewe pukfel mi pwarata eu tettenin an Kot akachocho ne eitau ngeni Noun kewe semerit, ina mo sise rongesich fansoun meinisin:

- Kot a kefinita emon soufos.
- Ewe soufos a afanafana ewe kapas allim me emweni ekkewe aramas.
- Kot a efeiochu ekkewe aramas.
- Ekis me ekis ekkewe aramas ra amonungawa are anneasonap ngeni ekkewe afanafanen ewe soufos. Mwirin fitu fansoun ra amam ewe soufos me an kewe afanafan me ra turutiw non rochopwak.
- Pokiten rochopwak, aramas rese chuen sinei usun ewe kapas allim. Kot a angei mwumwutan ewe Pristut senir.
- Nupwen a tori fansoun mi murino me aramas ra monnata ne appiru I sefan, Kot a kefinita pwan emon soufos, aniwinsefanito ewe pristut me ewe Mwichefen, me a emweni ewe soufos ne aiti ewe kapas allim.

*Wewen ekkewe kapas mi parapar mi fatetiw won peich 18 me 19.





JISES KRAIST A EFISATA AN MWICHEFEN

Seni fansoun ewe Forata, ekkewe noun Kot ra nenengeni fansoun feiton ewe Chon Amanau Jises Kraist. Usun chok a pwon, Semach won Nang a tinato Noun we, Jises Kraist, ngeni fonufan nap seni 2,000 ier ra no.

Jises Kraist a manau unusoch, ese wor tipisin. A efsata An Mwichefen, afanafana An kapas allim, me fori chommong manaman. A kefnita engon me ruemon mwan pwe repwe Noun kewe **Aposel**, fiti fengen me Peter, James, me John. A aitir me ngenir mwumwutan pristut ne afanafan non Itan me fori efeioch **mi pin**, usun **paptais**.

Nupwen Jises a efsata An Mwichefen, A angei kapasen emwen seni Semach won Nang. Mwirin a aiti Noun kewe chon kuno. Jises a aiti Noun kewe chon tapweno pwe pwarata seni Kot ena ewe achau Epwe kouta An we Mwichefen won.

Nesoponon Manauan, Jises Kraist a riaffouni me mano faniten tipisin meinisn ra fen manau are repwap manau won fonufan. Ei asor a iteni ewe **Achasefan**. Seni An riaffou, mano, me **Manausefan**, ewe Chon Amanau a atufichi kich ach sipwe angei omusomus. Ekkewe ir ra nuku non I, aier, me apwonueta An kewe annuk repwe angei omusomusen tipis me repwe uren kinamwe me pwapwa.

Mwirin An Manausefan, Jises Kraist a emweni Noun kewe Aposel seni pwarata. Ewe Paipen a uruoni chommong napanapen An sopweino ne emweni An Mwichefen (nengeni Foffor 10; Pwarata 1:1). Iei minne ewe Mwichefenin Jises Kraist a emwen seni Kot nge esap seni aramas.

Jises Kraist A etteteni An we Mwichefen:

- *A kokori me seikita ekkewe Aposel.*
- *A ngenir An mwumwuta ar repwe afanafan me paptais. Ei mwumwuta a iteni ewe pristut.*
- *Mwirin An mano me Manausefan, A sopweino ne emweni ekkewe Aposel ren pwarata.*

*Wewen ekkewe kapas mi parapar mi fatetiw won peich 18 me 19.

WE ROCHOPWAK MI NAP

Mwirin ewe manon Jises Kraist, aramas mi ngau ra esita me nieno chommong chon Mwichefen. Ekkoch chon Mwichefen ra rikino seni ekkewe nongonong mi afanafan seni Jises Kraist me Noun kewe Aposel. Ekkewe Aposel ra ninnino, me mwumwutan pristut—fiti fengen me ekkewe kii ne emweni me angei pwarata

R*en manon noun*
Jises Kraist kewe Aposel,
ewe ennet a poutuno sefan.

faniten ewe Mwichefen—a poutuno seni ewe fonufan. Pokiten ewe Mwichefen ese chuen emwen seni mwumwutan pristut, mettoch mi mwan a tomwaaninong non afanafanen Mwichefen. Aramasoch me watte

ennet mi chuen nom, nge ewe kapas allim Jises Kraist a efisata a poutuno. Ei sengan fansoun a iteni ewe Rochopwak mi Nap.

Ei rochopwak a efisi ewe foratan chommong mwichefen nge ar afanafan mi fiu fengen. Non ei fansoun, chommong mwan me fefin ra resin kutta ewe ennet, nge rese tongeni kuna. Chommong aramasoch ra nuku non Kot me Jises Kraist me ra achocho ne weweiti me aiti ewe ennet, nge ese nom rer unusen ewe kapas allim are mwumwutan pristut. Ren niwinin, iteiten pinon aramas ra weri eu fansoun rochopwak pwe aramas ra mwokutokut ren met ekkewe tappin aramas mwer ra fori, fiti fengen me ekkesiwinin an Kraist kapas allim.

Fitemon aramas mi mirit, usun Martin Luther me John Calvin, ra esinna pwe angang me nongonong ra siwin are poutuno. Ra sou-tuni ar repwe siwini ekkewe mwichefen ra choni. Nge faniten ese wor mwumwutan pristut, an Kraist kapas allim ese tongeni niwiniti nonnomun me akkom. Eu **aniwinsefanito** mi namwot.

*Wewen ekkewe kapas mi parapar mi fatetiw won peich 18 me 19.

Kot a sinei pwe epwe wor eu fansoun
rochopwak. Me ren emon soufosun

Testamen Noom, a apasa:

“Epwe ne tori ewe fansoun nupwen upwe tinato
nengita won ewe fonu. Ekkewe aramas repwe
ne echik, nge esap ren pinawa. Repwe ne kaka,
nge esap ren konik, Repwe ne echik me
kaka ren ew kapas seni ewe Samol.

“Ekkewe aramas repwe fein fetan seni ewe
Setin Mano tori ewe Setin Mediterranean pwan
tori ennefen feinno ngeni otiw. Repwe kutta
fetanei ekis meinisin eu kapas seni
ewe Samol, nge resap kuna.”

Amos 8:11–12



EW E ANIWINSEFANITON EW E KAPAS ALLIM.

Non 1820, usun chok a fori non fansoun nom, Semach won Nang a pwan kefnita emon soufos ne aniwinsfanito ewe kapas allim me ewe pristut ngeni ewe fonufan. Iten ena soufos Joseph Smith.

Neanuonun, Joseph a osukosuk ren sokofesenin chommong ekkewe mwichefen non nenian we me a mochen sinei menni mwichefen mi pung. A sinei pwe a osupwangen mirit, iwe a tapweno ewe aurour a nom non ewe Paipen, “Nge ika emon me neimi ese mirit, epwe tingor ngeni Kot, iwe Kot epwe Ngeni I, pun Kot mi kisasew o kirokiroch ngeni aramas meinisin” (James 1:5).

Joseph Smith a finata pwe epwe eisini Kot met epwe fori. Nupwen Joseph a iotek ne sinei ewe ennet, Semach won Nang me Jises Kraist ra pwa ngeni i. Jises a ereni Joseph pwe esap fiti eu me nein ekkewe mwichefen, pwe “ir meinisin mi mwan” me “ra arap ngeniei ren awer, nge netiper ra touau seniei, pwe ra afanafana ekkewe annukun aramas usun nge ita pwe wesewesen nongonong, mi nom rer ekkis napanapen kot, nge ra amam ennetin ewe manaman.” (Joseph Smith—History 1:19).

Usun Kot a for ren Adam, Noah, Abraham, Moses, me pwan ekkoch soufos, A kefnita Joseph Smith pwe epwe emon soufos ne aniwinsfanito unusen ewe kapas allim.

Joseph Smith a kuna Semach won Nang me Jises Kraist. Usun fisin ei mettoch, a apasa:

“Ua kuna eu saram, a fakkun saramaram nap seni ewe tinin akkar, a nom wenewenen mokurei. Ewe Saram a chok sarametiw ekkis me ekkis tori a nom woi. . . .

“Nupwen ewe saram a toriei ua kuna ruemon Aramas, ukukun ninger use tongeni awewe, nge ra chok ukuta non asepuwan. “Emon me neir a fos ngeniei, a kokoriei ren itei, a itini ngeni ewe emon me a apasa—

Iei Nei we At mi Achengicheng. Kopwe ausening ngeni I!”

Joseph Smith—History 1:16–17

Ewe Aniwinsefaniton ewe Pristut

Non 1829, Joseph Smith a angei ewe chok mwumwutan pristut Jises Kraist a ngeni Noun kewe Aposel. John ewe Sou Papatais, ewe a paptaisi Jises, a pwa ngeni Joseph Smith me a efeiochu ren ewe **Pristut seni Aaron**, are pristut mi kukkun. Mwirin Peter, James, me John (unumon me nein noun Jises Kraist kewe Aposel me akkom) ra pwa ngeni Joseph Smith me ra efeiochu ren ewe **Pristut seni Melkisetek**, are pristut mi tekia.

Mwirin a angei mwumwutan pristut, Joseph Smith a emwen ne efisi sefan ewe Mwichefenin Jises Kraist won fonufan. Me ren i, Jises Kraist a kefnita sefan Engon me Ruemon Aposel.

Jises Kraist a tinano John ewe Sou Papatais me unumon Noun kewe Aposel ne ngeni Joseph Smith mwumwutan pristut.

Usun chok Jises Kraist a emweni Noun kewe Aposel seni pwarata mwirin An Manausefan, A sopweino ne emweni ewe Mwichefen ikenai me ren soufos me aposel mi manau. Ewe Presetenin Ewe Mwichefenin Jises Kraist ren Aramas mi Pin non Fansoun Soponon i ewe soufosun Kot mi kefnita ikenai. I, noun kewe

chon aninis, me ekkewe Engon me Ruemon Aposel ra amwochu ewe chok mwumwutan pristut minne meinisin ekkewe soufos me aposel me noom ra angei. Ekkei mwan ir soufos, chon oesini, me chon pwarata.

*Wewen ekkewe kapas mi parapar mi fatetiw won peich 18 me 19.





EWE PUKEN MORMON

Usun eu kinikinin ewe Aniwinsfaniton ewe kapas allim, Kot a esenipato ewe Puken Mormon: Pwan eu Kapasen Pwarata usun Jises Kraist. Seni ewe manamanen Kot, Joseph Smith a chiakuni ei puk seni eu uruon noom mi mak won seleich minen kolt. Ewe Puken Mormon a “eu puken uruon an Kot angang ngeni ekkewe aramasen nom non Amerika, a masou ngeni unusan ewe kapas allim esemuch” (nepoptan ewe Puken Mormon).

Ewe Puken Mormon a eu minen pwarata mi pochokun usun Jises Kraist. A anisikich ne weweiti An kewe afanafan, fiti fengen me afanafanen ewe Paipen.

Ewe Puken Mormon a eu minen pwarata usun ewe Aniwinsfaniton ewe kapas allim me ren Joseph Smith. En mi tongeni pwisin sinei ika pwe ewe Puken Mormon mi ennet. Ren om kopwe sinei, mi namwot kopwe anneani, ekipwichi ewe poraus, me mochen siniei ika mi ennet. Mi namwot kopwe tingorei Semach won Nang an epwe apungano pwe mi wesewesen Kapasan. Ika ka fori iei usun, I Epwe pwarata ngonuk me ren ewe **Ngun mi Fel** pwe mi ennet.

Nupwen ka sinei pwe ewe Puken Mormon mi ennet, kopwe pwan sinei me ren ewe Ngun mi Fel pwe Joseph Smith i emon soufosun Kot, pwe ewe kapas allimen Jises Kraist mi aniwinsfanito me ren i, me Ewe Mwichefenin Jises Kraist ren Aramas mi Pin non Fansoun Soponon mi emwen seni emon soufos me ekkewe aposel ikenai.

Ka tongeni sinei pwe met ekkewe misineri ra aituk mi ennet ika ka anneani me iotek usun ewe Puken Mormon:

“Are oupwe tungor ren ennetin netipemi, ren ami mochen sinei, fiti ami nuku non Kraist, iwe, i epwe pwar ngenikemi ennetin pungun ekkei mettoch, ren ewe manamanen Ngun mi Fel.

“Iwe, ren manamanen ewe Ngun mi Fel oupwene sinei ennetin pungun mettoch meinisin.”

Moroni 10:4-5

*Wewen ekkewe kapas mi parapap mi fatetiw won peich 18 me 19.

IFA USUN UA TONGENI SINEI?

Ka tongeni sinei pwe ei poraus mi ennet. Ika ka tingor ngeni Semom won Nang non iotek, kopwe angei pwonuen om iotek seni I me ren ewe Ngun mi Fel. Ewe Nugn mi Fel mi pwan iteni

ewe Ngunun Kot, iwe eu Wisan ena pwe epwe minen pwarata, are kapasen pwarata, usun ewe ennet.

*I*fa Usun Upwe Iotek?

- *Kokori iten Semom won Nang.*
- *Pwarata ekkewe mefien netipom (kinisou, kapas eis, tingor ne apungano ennetin ewe Puken Mormon me met ekkewe misineri mi afanafan).*
- *Osoḡwano (“Faniten Jises Kraist, amen”).*

Ei mirit mi tongeni amwarar me siwini manauom, nge napengeni epwe feito non napanapen mosonoson esap wor eu pwaratan amwararen an Kot manaman. Ewe Ngun mi Fen epwe apungano ewe ennet ren memmef, ekiek, me pwarata. Usun chok ewe Paipen a aitikich, “Nge iei ekkewe uwan Ngunupin: tong, pwa-pwa, kinamwe, engino, umoumoch, manauoch, nikitū, tipetekison, me nemeni mochenin netipach” (Galatia 5:22–23). Ekkei memmef seni ewe Nugn mi Fel mi pwisin pwarata ngonuk pwe ewe kapas

allimen Jises Kriast mi aniwinefanito me ren Joseph Smith mi ennet. Iwe mi namwot kopwe finata ika pwe fetanin manauom epwe tipeu fengen ren ewe mirit ka angei.



TETTENIN KAPAS

Achasefan Ewe angang mi etufichi kich ach sipwe chasefan ngeni Kot. Achasefani a wewen riaffouni niwinin tipis, iwe epwe uweino niwinin tipis seni chon tipis mi aier. Jises Kraist I chok ewe emon mi tongeni fori eu Achasefan mi unusoch faniten aramas meinisin. An asoren Achasefan a masoueni An riaffou faniten tipisich, surutiwen Chaan, me An mano me Manausefan. Pokiten ewe Achasefan, chon fonufan meinisin repwe manausefan. Ewe Achasefan a pwan awora ngeni kich eu anen ach sipwe museno seni tipisich me sipwe manau fengen ren Kot feinfeino chok.

Aniwinsefanito Fori och mettoch an epwe usun chok me akkom; for sefani; asofo sefani. Mwirin ennet me mwumwuta ra pou-tuno seni fonufan, ewe kapas allim a aniwinato sefan me ren ewe Soufos Joseph Smith. Aniwinsefanito a sokofesen seni siwinin och mettoch pwe *siwini* a wewen aochun och mettoch mi fen nom are angang non eu achocho pwe och mettoch epwe usun me akkom nge *aniwinsefanito* a wewen efisatan are asofo sefanin ewe mettoch are angang mi nom me akkom pwe epwe unusoch.

Annuk Pwisin Eu fofor mi pin a fis ren mwumwutan ewe pristut. Awewe chok pwe paptais.

Aposel Ewe itenap Jises Kraist a ngeni ekkewe engon me ruemon mwan A kefnita pwe repwe ennetin chiechian kewe non An afanafan fetan won fonufan me a ngenir mwumwuta ne angang non Itan. Non ekkewe ranin ei fansoun, Jises Kraist a kefnita pwan ekkoch mwan pwe repwe angang usun Noun kewe Aposel. Usun chok fansoun nom, emon Aposel mi emon chon pwarata mi auchea usun Jises Kraist me mi wor an mwumwuta seni I.

Kapas Allim An Semach won Nang we kokot ne anisikich ach sipwe kinamwe non ei manau me pwapwa non manau esemuch. Ewe kapas allim mi anongonong won ewe Achasefan an Jises Kraist me mi anamwota kich ach sipwe nuku non I, aier, paptais, angei ewe Ngun mi Fel, me nikitu tori nesoponon.

Manausefan Mwirin ewe manon inis, ewe chusefan fengenin ewe ngun ren ewe inisin futuk me chuu mi unusoch. Jises Kraist i ewe akkaewin aramas ne manausefan.

Ngun mi Fel Mi pwan iteni ewe Ngunupin, ewe Ngunun Kot, me ewe Chon oururu netip. Epwe awora minen pwarata, are kapasen pwarata, usun Semach won Nang me Jises Kraist me a pwarata o aiti ewe ennet.

Paptais Eu kinikinen ach sipwe angei omusomusen tipisich mi unusen namwot. Me ren ach paptais me apungano seni mwumwutan pristut, sia winiti chon Ewe Mwichefenin Jises Kraist ren Aramas mi Pin non Fansoun Soponon. Paptais epwe mono fan konik, wewen pwe ewe emon mi paptais epwe tueno fan konik. Paptais a pwarata ach mochen tapweno an Kraist nenien appiru me fori pwon mi pin ren Kot.

Pristut Ewe mwumwuta me manamanen Kot. Kot a ngeni ekkewe mwan ei manaman ne angang fan Itan. Ewe Pristut seni Aaron a niwinsefan ngeni Joseph Smith me ren John ewe Sou Papatais, ewe a paptaisi Jises. Ewe Pristut seni Melkisetek a niwinsefan me ren Peter, James, me John, unumon me nein noun Jises kewe Engon me Ruemon Aposel.

Pristut seni Aaron Ewe pristut mi kukkun Ei pristut mi masoueni ewe mwumwuta ne paptaisi aramas me mi iteit mwirin Aaron non ewe Testamen Noom an ewe Paipen.

Pristut seni Melkisetek Ewe pristut mi tekia are napanap. Mi iteit mwirin Melkisetek non ewe Testamen Noom an ewe Paipen, i emon pris mi napanap me king mi wenechar.

Pwarata Poraus fengen nefinen Kot me Noun kewe semerit, napengeni a fis me ren ewe Ngun mi Fel. Emon me emon a tongeni angei pwarata ne emweni pwisin manauan, nge ewe soufos chok a kefnita me ren Kot a tongeni angei pwarata faniten unusen fonufan. Pwarata a feito non sokopatten napanap, nge napengeni epwe feito non ekiek, memmef, me nuku.

Rochopwak Nupwen emon, ewe Mwichefen, are unusen eu mwichen aramas ra amam are kunu seni ewe kapas allimen Jises Kraist. Rochopwak mi efisi aimufesen, osukosuk, me nikitanon ewe mwumwutan pristut, are ewe pung ne angang faniten Kot.

PWAN OCH NE KAEO NGENI

Ekkewe kapas eis me wokisin mi nom fan repwe anisuk ne kaeo pwan och usun ekkewe nongonong non ei puk me ekipwichir. Ei tettenin kapas eis me wokisin rese unus; ekkewe minen esinin non ekkewe pukfel repwe emwenuk ngeni pwan ekkoch wokisin me minen aninis.

Me reom met wewen pwe Kot i Semom won Nang?

Malachi 2:10 (Paipen, Testamen Noom)

Hebrew 12:9–10 (Paipen, Testamen Noom)

Ifa wisen emon soufos? Pwata mi auchea ne sinei pwe Kot mi fos ngeni soufos?

Amos 3:7 (Paipen, Testamen Noom)

Jacob 4:4–6 (Puken Mormon, peich 124)

Met wewen ne amwochu mwumwutan pristut? Ifa usun emon epwe angei ei mwumwuta?

Matthew 10:1 (Paipen, Testamen Sofo)

John 15:16 (Paipen, Testamen Sofo)

Met epwe fis nupwen mwumwuta mi poutuno?

Amos 8:11–12 (Paipen, Testamen Noom)

1 Nifai 13:24–29 (Puken Mormon, peich 25–26)

Noun Jises Kewe Aposel ir mi sinei pwe eu fansoun ro chopwak epwe fis?

Foffor 20:28–31 (Paipen, Testamen Sofo)

2 Thessalonica 2:2–3 (Paipen, Testamen Sofo)

2 Timothy 4:3–4 (Paipen, Testamen Sofo)

Me reom met wewen pwe ewe kapas allimen Jises Kraist mi aniwinefanito me ren Joseph Smith?

Ewe Kapasen Pwaratan ewe Soufos Joseph Smith (kukkun puk)

Met ewe Puken Mormon? Ifa usun a eu minen pwarata usun wisen Joseph Smith pwe i emon soufos?

Puken Mormon peichen itenap

Puken Mormon nepoputan

Ifa wisen ewe Ngun mi Fel

Alma 5:45–47 (Puken Mormon, peich 95)

Moroni 10:3–5 (Puken Mormon, peich 237-238)

FITEKEM NON AM FEN NGENI KOT

KENE FEITO O NENGENI IFA USUN ANIWINSEFANITON
EWE KAPAS ALLIM A TONGENI EFEIOCHU MANAUOM



Mwichen Sakramen ena ewe mwichen fen mi napanap. Ururun epwe ukukkun eu awa me epwe masoueni ekkei mettoch mi nom fan:

Ekkewe Kon: Chon ewe mwich ra kon fengen. (Aupwe awora ekkewe puken kon.)

Ekkewe Iotek: Chon Mwichefen repwe wisen iotek.

Ewe Sakrament: Chon pristut repwe efeiochu me ineti pinewa me konik ngeni chon ewe mwich non achechemenien ewe Achasefanin Jises Kraist.

Chon Afanafan: Ururun emon are ruemon chon mwichefen ir mi fen kefin me mwan repwe afanafan ngeni chon ewe mwich usun itenapen kapas allim.

Ufouf: Ururun mwan me at repwe ufouf non sut are rausas mi kat ren echo soch me nektai. Fefin me ngenin repwe ufouf non skato mi kat. Nifangenon moni ese namwot non mwichen fen.

Aua pwan etiwok om kopwe fiti pwan ekkoch mwich, anongonong won met ka sani me ierum. Tettenin me fisin ekkei mwich mi sokopat.

Sukunen Raninfel: Ekkoch klas faniten kaeo ngeni pukfel me nongonongen kapas allim.

Mwichen Pristut: Klas faniten mwan me anuon a 12 ierir are watte seni.

Fin Anisi: Klas faniten fefin a 18 ierir are watte seni.

Ekkewe Fopun: Klas faniten nengin a 12 ngeni 18 ierir.

Kinter: Mwokutokutun mwich me klas faniten semerit a 3 ngeni 11 ierir. Fan ekkoch epwe wor eu mwich faniten ekkewe semerit a 18 maramer ngeni 3 ierir.



Kunoken mwichen Sakramen: _____

Iten nenien Imwenfan: _____



Met Upwe Fori?

- Aneani ewe Puken Mormon.

Mi och kopwe aneani: _____

- Kene iotek om kopwe sinei pwe Joseph Smith i emon soufos me ewe Puken Mormon mi ewe kapasen Kot.
- Fiti fan.
- Finata ika kopwe appiru ewe Chon Amanau seni om kopwe paptais. Ranin paptais:

- Kopwe feino won www.mormon.org ne kaoe pwan och usun ewe kapas allimen Jises Kraist mi niwinsefanito.
- Kopwe sopweino ne chufengen ren ekkewe misineri ne kaoe pwan och usun ekkewe ennet Kot a aniwinato me ren ekkewe soufos non fansoun sponon.

Ranin ach chusefan: _____

- Iten ekkewe misineri me nampan nour we fon:

EWE MWICHEFENIN
JISES KRAIST
REN ARAMAS MI PIN NON
FANSOUN SOPONON

www.mormon.org

Esinnan Chon Fori Sasing

Apponun me mwan: Ewe Apanen Siip Mi Mwanecheno, seni Del Parson. © Del Parson.

Kosap kapini

Peich 2 © Comstock

Peich 5: Chunganin Ewe Soufos Isalah A Kapas Oesini Usun An Kraist Uputiw,

seni Harry Anderson

Peich 6: Chunganin Kraist A Saikita ekkewe Engon Me Ruemon Aposei, seni Harry Anderson

Peich 13: Chunganin Ewe Niwinsefaniton ewe Pristut seni Melkisetek, seni Kenneth Riley

Peich 14: Chunganin Jises Kraist A Churi ekkewe Chon Merika, seni John Scott

© 2012 seni Intellectual Reserve, Inc. Meininis pung mi kawor. Mi for non Merika.

Kapungunon non losun Merika: 11/05. Kapunguno chiakun: 11/05. Chiakun *The Restoration of*

the Gospel of Jesus Christ. Chuukese. 01140 901

CHUUKESE



4

02011 40901

6

01140 901